



游藝文叢刊

曹 繡 君 編

上海文書局印行

曹繡君編

游戲文學叢刊下

文明書局印行

編輯者 續溪曹繡君

發行者 文明書局

印刷者 文明書局

發行所 上海文明書局

發行所 中華書局

北平 天津 張家口 保定 石家莊
重慶 長沙 常德 衡州 漢口

處
中華

南京 杭州 福州 廈門
烟台 鄭州 青島 溫州

自序

相字二字。始見於春渚紀聞。卽今之所謂測字也。往予閱古今圖書集成藝術典。至拆字一部。心好之。惜所載無幾。不足以資觀覽。後得周亮工字觸六卷。采擷似稍博矣。以與拆字無涉者居多。未鑒夙望。且強半不著所出。彌難依據。久思爬梳鉤索。萃成專冊。苦未知拆字之權輿。輒投筆而罷。最後讀趙雲松陔餘叢考。始知相字之術。肇於後漢。爲之狂喜。年來從事纂輯。得八十餘則。談言微中。亦足以解紛。似不得僅作術數觀也。爰別錄一通。就正於況蕙風詞丈。蕙風曰。相字小數也。散見古人雜著間有之。然亦如鳳毛麟角。以予所知。最著者爲南宋謝石。其後罕有流傳。見於題詠尤少。唯元胡炳文雲峯詩餘。載有贈吳葵玄詞。謂又玄相字。間論人窮達貴賤。婁多命中。爲相字家徵雅故。當必首數此。

詞言猶在耳。而蕙風已成宿草。欲求又玄相字之故實。卒無人能徵一二者。良可惜也。

游戲文學
叢刊之五

相字驗存

測字之術。不知起於何時。後漢書。公孫述夢有人告之曰。八天子系十二爲期。述以爲公孫當貴之兆。遂稱帝。蔡茂傳。茂夢坐大殿上。有三禾。茂取之。得其中穗。又失。郭賀曰。於字禾失爲秩。雖曰失之。乃所以得祿也。此後世測字之權輿。陔餘叢考

何祇字君肅。嘗夢井中生桑。以問占夢趙直。直曰。桑非井中之物。會當移植。然桑字四十下八。君壽恐不過此。祇笑言。得此足矣。卒如其言。益部耆舊傳

魏文帝卽位。權問羣臣曰。曹丕以盛年卽位。恐孤不能及之。羣臣未對。澤曰。不及十年。不其沒矣。大王勿憂也。權曰。何以知之。澤曰。以字言之。不十爲丕。其數也。文帝果七年而崩。吳志關澤傳

黃平夢書一髮字。書影而止。索統曰。此亡友也。是日果有友人計至。潛居錄

梁武帝除劉顯國子博士。時有沙門訟田。帝書曰。貞有司未辨。徧問莫知。顯曰。貞字文爲。與上人。帝因忌其能。出之。南史劉瓛傳

侯景常謂人曰。侯字人邊作主。下作人。此明是人主也。臺城旣陷。武帝嘗語人曰。侯景必得爲帝。但不久耳。破侯景字。成小人。百日天子。爲帝當得百日。按景以辛未年十一月十九日篡位。壬申年三月十九日敗。得一百二十日。而景以三月一日。便往姑熟。計在宮殿。足滿十旬。其言竟驗。南史侯景傳

梁武陵王紀。僭卽帝位。建元曰天正。永豐侯蕭撫曰。王不克矣。昔桓玄年號大亨。有識者以爲二月了。而玄之敗。實在仲春。今日天正。正之爲文。一止。其能久乎。果一年而敗。隋書五行志

武平七年。後主爲周師所敗。走至鄴。自稱太上皇。傳位於太子恆。改元隆化。時

人離合其字曰降死。竟降周而死。隋書五行志

周武帝改元爲宣政。梁主蕭歸離合其字爲宇文亡日。其年六月帝崩。隋書五行志

開皇初。梁主蕭琮改元爲廣運。江陵父老相謂曰。運之爲字。軍走也。吾君當爲軍所走乎。其後琮朝京師而被拘留不返。隋書五行志

齊文宣帝改年爲天保。士有深識者曰。天保之字爲一大人。只十帝。其不過十乎。北史

煬帝會飲。爲析字令。侍女杳孃。析杳字爲十八日。帝曰。能析朕字乎。杳孃曰。移左畫。居右畫。豈不成淵字耶。遂成唐興之兆。南部烟花記

開元末。於弘農古函關得寶符。遂改元天寶。其符白石赤文。正成棄字。識者曰。四十八也。及帝幸蜀之來歲。正四十八年。開元傳信錄

孟簡將試。詣日者卜之。曰：「近東門坐。卽得之矣。」旣入。卽坐西席。迫晚。忽得疾。鄰坐請與終篇。見其姓。卽東門也。乃擢上第。字觸

洛州杜元。有牛一頭。元甚憐之。夜夢見其牛有兩尾。以問占者李仙藥。曰：「牛字有兩尾。失字也。經數日。果失之。」朝野僉載

裴晉公征吳元濟。掘地得一石。有字云：「雞未肥。酒未熟。相字者解曰：『雞未肥。無肉也。爲己。酒未熟。無水也。酒去水爲酉。破賊在己酉乎。』」果然。新訂指明心法

柳員外宗元。自永州司馬徵至京。意望錄用。一日詣卜者問命。且告以夢曰：「余柳姓也。昨夢柳樹仆地。其不吉乎。」卜者曰：「無苦。但憂爲遠官耳。」徵其意曰：「夫生則柳樹。仆則柳木。木者牧也。君其牧柳州乎。」卒如其言。因話錄

唐僖宗改廣明元年。相者曰：「人自崖下出。姓黃氏。左足踏日。右足踏月。自此天下被擾。是年黃巢入長安亂天下。」隨筆云：「廣明爲唐去丑口。而著黃家日月。以

兆巢禍之亂字觸

李嵩有書召玉局觀楊德輝赴齋。有老道士崔無斂。自言患聾。有道而託算術。往往預知吉凶。德輝問曰。將欲北行。何如。崔令畫地作字。弘農乃書北千兩字。崔公以千插北成乖字。去卽乖耳。楊生不果去。而李嵩齋日就擒。道士多罹其禍。楊之幸免。由崔之力也。北夢瑣言

梁開平二年。使其將李思安攻潞州。營於壺口關。伐木爲柵。破一大木。木中朱書隸文六字。曰天十四載石進。思安表上之。其羣臣皆賀。以爲十四年必有遠裔貢珍寶者。司天少監徐鴻謂所親曰。自古無一字爲號者。上天符命。豈闕文乎。吾以爲丙申之年。當有石氏王此地者。蓋移四字中兩豎。置天字左右。卽丙字也。移四之外圍。以十字貫之。卽申字也。後至丙申歲。晉高祖以石姓起并州。如鴻所言。稽神錄

盧道者精於卜。後唐同光二年。有郡倖因內孕歲餘不產。求盧道者卜之。書一醋字。遂不踰月二十一日酉時。倖以爲神。建塔居之。後於宋乾德間坐化。廣

西通志

耶律乙辛母方娠。夜夢手搏殺羊。拔其角尾。旣寤。占之術者曰。吉兆也。羊去角尾爲王字。汝後有子當王。後清寧五年。仕至北院樞密使。遼史姦臣傳

宋太宗改元太平興國。相字者曰。太平二字。乃一人六十。壽止此矣。太宗果享年六十。而周尙幹年終。將換桃符。製數十聯。皆不愜意。周梅坡扶箕。降紫姑。得兩句云。門無公事往來少。家有陰功子孫多。甚喜。大書於門。相字者曰。每句用上三字。其兆不祥。上句云。門無公。是年尙幹卒於官。乃父致政亦卒。乃兄卒。俱無子。門無公。家有陰。兆於此矣。新訂指明心法

蘇子瞻謫儋州。以儋與瞻字相近也。子由謫雷州。以雷字下有田字也。黃魯直

謫宜州。以宜字類直字也。此章子厚駭譴之意。當時有術士曰。儋字從立人。子瞻其尙能北歸乎。雷字雨在田中。承天之澤也。子由其未艾乎。宜字乃直字。有蓋棺之義也。魯直其不返乎。後子瞻北歸。至毘陵而卒。子由退老於穎。十餘年乃終。魯直竟卒於宜。鶴林玉露

梁顥進選前十日。夢人賜犬肉一片。顥不悅。以問術者。曰。狀字也。果爲狀元。字觸

臨邛費孝先山人。賣卜成都五十年。自云傳管輅軌革術。其卦有歌有影。世稱其術。四方士大夫求占者甚衆。其尤可怪者。或因字以決吉凶。然一字而數人占得之。其應之者不同。有一郎官占得一解字。尋出守解州。一舉子亦得一解字。是年爲本府魁薦。一不肖子亦得一解字。俄亦屠刀被刑。牛角有刀。解也。事莫可曉。事文類聚

蔡元長。元符末。閒居錢塘無慘。中春時往雪州遊郊外慈感寺。寺僧新建一堂。頗偉深。元長卽拈筆題云超覽堂。適有一客在座。自云能相字。起賀云。以字占之。走召入見。而臣字旁觀如月。四字居中。當在初夏。已而果然。揮麈餘話。

熙寧末。神宗改元。近臣擬豐亨進。上指亨字曰。爲子不成。可去亨而加元。遂以

元豐紀年。塵史

謝石潤夫。成都人。宣和間。至京師。以相字言人禍福。求相者但隨意書一字。卽就其字離析而言。無不奇中者。名聞九重。上皇因書一朝字。令中貴人持往試之。石見字卽端視中貴人曰。此非觀察所書也。然謝石賤術。據字而言。今日遭遇。卽因此字。黥配遠行。亦以此字也。但未敢遽言之耳。中貴人愕然。且謂之曰。但有所據。盡言無懼也。石以手加額曰。朝字離之爲十月十日。若非此月。此日所生之天人。當誰書也。一座盡驚。中貴馳奏。翊日召至後苑。令左右及宮嬪書。

字示之。皆據字論說禍福。俱有精理。錫賚甚厚。並與補承信郎。緣此四方求相
字者。門庭如市。有朝士。其室懷妊。過月。手書一也字。令其夫持問石。是日座客
甚衆。石詳視字。謂朝士曰。此閣中所書否。曰。何以言之。石曰。謂語助者。焉哉乎
也。固知是公內助所書。尊閣盛年三十一。否。曰。是也。以也字上爲三十。下爲一
字也。然吾官寄此。嘗力謀遷動。而不可得。否。曰。正以此爲撓耳。蓋也字著水則
爲池。有馬則爲馳。今池運則無水。陸馳則無馬。是安可動也。又尊閣父母兄弟
近身親人。當皆無一存者。否。曰。何以知之。曰。以也字著人。則是他字。今獨見也
字而不見人。故也。又尊閣其家物產。亦皆蕩盡。否。曰。以也字著土。則爲地字。今又
不見土也。二者俱是否。朝士曰。誠如所言也。然此皆非所問者。但賤室以懷妊
過月。方竊憂之。故來問耳。石曰。是必十三個月也。以也字中有十字。并兩旁二
豎。下一畫。爲十三也。石熟視朝士曰。有一事似涉奇怪。固欲不言。則吾官所問。

正決此事。可盡言否。朝士因請其說。石曰。也字著虫爲蛇字。今尊閣所姪。殆蛇妖也。然不見蟲蠱。則不能爲害。謝石亦有薄術。可爲吾官以藥下驗之。無苦也。朝士大異其說。敦請至家。投之以藥。果下小蛇數百而體平。都人益共神之。竟不知其所挾何術也。春渚紀聞

謝石。蜀人。紹興八年來臨安。占驗奇異。有樊將士書失字。卜妻所亡珠冠安在。石曰。從朱求可得也。曰。此吾內兄。安有此。曰。在占宜然。歸詢諸家。朱嘗假帽不用而返。啟視之。冠果在帽下。又一選人病。書申字以問。而下有燥筆。石曰。丹田既燥。必死矣。期當在明日申時。果然。石初入京師。徽宗書問字。命一隸持往。石緘封之。戒其到家方發。隸歸奏。上啟讀。乃曰。左爲君。右爲君。聖人萬歲。遂補承信郎。有道士亦以問字。占。石曰。門雖大。只有一口。蓋所住無他。黃冠也。猶復以器字占。曰。人口空多。皆在戶外。始大服。浙江通志

宋季有謝石者。善測字。高宗微行遇之。書一問字令測。石思曰。左看似君。右看是君。殆非凡人耶。疑信間。請再書一字。高宗以杖卽地畫一字。石曰。土上加一。王也。是吾君王乎。遂拜伏。高宗旣歸。招而官之。後秦檜當國時。高宗書一春字。命測之。其上半體墨重。石奏曰。秦頭太重。壓日無光。檜聞而銜之。中以危法。編管遠州。道遇一老人於山下。亦善測字。石就之。書一謝字求測。老人曰。子於寸言中立身術士也。舉掌令更書以下所終。石書一石字。老人曰。凶哉。石遇皮必破。遇卒必碎矣。時押石之卒在旁。而書字在掌中。故云。石大歎服。請老人作字。測爲何人。老人曰。卽以我爲字可也。石曰。夫人而立山傍。子殆仙哉。乃下拜。願執弟子禮。請益。曰。吾術似無減先生。乃先生居然仙矣。而吾茲不免塵網。何也。老人曰。子以字爲字。吾以身爲字也。權子。

徽宗令中官索東宮書一字來。乃以太字進。問石。石曰。此天子也。上詢謂何。曰。

太字點微橫。此必太子。他日移置諸上。豈非天子耶。鐵圍山叢談

謝石善拆字。歸蜀。有士人文覺。戲以乃字爲問。爲其無可拆也。石曰。及字不成。君終身不及第。有人遇於塗。告以婦不能產。書日字於地。石曰。明出地上。得男矣。其驗如此。每肆中以牌寫千字。不識字者。任其所指。禍福皆應。邵溥尙書第三子不肖。遇其拆字。卽加窘辱。石甚畏之。石在徽宗時。嘗稱承信郎。一日謂石我亦能拆字。石詰之。則曰。汝姓謝。所謂身在討論之中。石則終身右選。不能出頭。聞者大笑。二老堂雜誌

宋欽宗改元靖康。術者曰。靖字當立十二個月。甫一年而北遷。字觸

世俗善謔者。多拆字爲謎。然多無文理。極不足稱。傳說曩同僚坐間。舉儉字謎。一人立。三人坐。兩人小。兩人大。其中更有一二口。教予如何過。其意甚明白。真善謔而有益者。豈特可助談話而已。故筆之。梁溪漫志